

Uunga siunnersuut: Suliniutini angisuuni illuliortiternernik sanaartornernillu suliassat pillugit Inatsisartut inatsisaata allangortinnissaa pillugu Inatsisartut inatsisaat nr. xx, xx. xxx 2019-imeersoq
Inuussutissarsiornermut Nukissiuuteqarnermullu Naalakkersuisoq

Akissuteqaat

(Inuussutissarsiornermut, Nukissiuuteqarnermut Ilisimatusarnermullu Naalakkersuisoq)

Aappassaaneerera

Inatsisissatut siunnersuutip suliarineranut atatillugu sukumiisumik suliaqarsimaneranut Inuussutissarsiornermut Aatsitassanullu Ataatsimiititaliaq Naalakkersuisut sinnerlugit qutsavigissavara.

Siunnersuummut tunngatillugu ataatsimiititaliami amerlanerussuteqangaatsiartoq tapersersuinerat Naalakkersuisut nuannaarutigalugu maluginiarpaat.

Inatsisissatut siunnersuummi qitiusutut ilaasunut apeqqutit pingaarutillit arlallit ataatsimiititaliap isumaliutissiisutaani suliarineqarput, ilanngullugu suliniutinut angisuunut inatsit pisortat sanaartugarisaannik ilaatitaqassanera pillugu apeqqut.

Suliniutinut angisuunut inatsit tassuuna paatsuugassartaqanngilaq. Inatsit malillugu taamaallaat aatsitassarsiorfimmik imaluunniit erngup nukinganik nukissiorfimmik sanaartornermut atatillugu Kalaallit Nunaanni angerlarsimaffilimmut aktianik pigineqatigiiffiusumut ingerlatseqatigiiffimmut suliniutinut angisuunut akuersissummik nalunaaruteqartoqarsinnaavoq. Suliniutinut angisuunut inatsimmi anguniakkat pingaarutillit ilaat tassaavoq inatsisip atugaqarfigisaanut ilaasuni sanaartornermik suliniutinut namminersuutigisanik aningaasaliissutinik pissarsiniarnerup oqinnerulersinnissaa.

Nukissiorfiit aktianik pigineqatigiiffinngortissinnaanera pillugu apeqqummut ataatsimiititaliami amerlanerussutillit isumaliutissiisummi isummersimannginnerat Naalakkersuisut nalunaarsimavaat.

Aalajangiiffigisassatut siunnersuut UKA 2019/153 naapertorlugu Qasigiannguanut aamma Aasiannut pilersuisussamik nutaamik erngup nukinganik iluaquteqarluni nukissiorfiliornissap, aamma Nuup erngup nukinganik iluaquteqarluni pilersorneqarnerata annertusineqarnissap aningaasaliiffiginissaat, ingerlanneqarnissaat pigineqarnissaallu pillugit UKA 2020-mi oqaluuserisassatut siunnersuummik Naalakkersuisut saqquumiussiniarput.

Inuiaqatigiinnut apeqqutit assut pingaaruteqartupilussuit pineqarput, taakkulu sukumiisumik misissueqqissaarinerit tunngavigalugit Inatsisartut aalajangiisinnaanissaannik pisariaqartitsipput.

Taamatut oqaaseqarlunga Naalackersuisut sinnerlugit siunnersuutip taamatut iluseqartutut inaarutaasumik akuersissutiginnissaanut pingajussaaneernissaanut ikaarsaariartinnissaa inassutigissavara.